

太上一乘海空智藏經卷之三

月三

法相品

爾時海空智藏即起于席嚴整衣被手執香
鑪正對

天尊恭敬而立念想瞻視目无他顧心无他
想爾時

天尊和聲問言大德仁者何為翹翹懇倒若
此欲有所決將不及耶我為天人大道之主
辯才无闕洞達玄微善能解說无量義藏曉
知十轉一切法門又能分別他心所願莫不
通照宜有所問勿致疑難當為剖判甚深道
本

於是海空智藏安詳答言大智天尊我欲有
問未敢發言天尊知時先賜矜誘慈悲優悅
安慰我心是知天尊定為世父衆生所依萬
兆所宗我今承藉大威神力憐愍我故輒吐
鄙言願垂省納大聖天尊向者大慧請問重
疑四道之中何者差別得果不同成就各異
天尊答旨宣滯泠然諸滯雲釋无復猶豫決
定直指智慧之源

天尊又復答妙思言一切善惡皆因於緣緣
藉心起又答決理心力不定是生善惡如此
妙說皆自清通我今尚疑願為決了天尊以
何因故生諸法本一切法本有為之相即是
實耶即是空耶是不空不實耶若是實者則
應永定无有移轉若是空者性相分明有彼
此狀若是實者則无滅滅若是空者則无興
起若是實者應有形質若是空者應无證驗
若是實者一切賢聖既得道後法何所存若
是空者一切賢聖云何修行處无上惠若是
實者一切賢聖捨此法相得此法相捨此法
相法相云何若存若亡得此法相法相云何
從何而生若是空者則无捨法受法之異若
是實者在衆生身處於何處若是空者衆生
无法不容不立若是實者去來往返應有閼
著若是空者去來往返應无所繫以是因緣
一切法相未可測度空有二方不知其際唯
願天尊降垂辯釋爾時
天尊答海空智藏言善哉善哉真人大士心
了法相清淨无累是故能有今者之問所謂

利益一切成就无量功果之津於斯已現我
當為汝分別解說使今會衆及未來生成得
照了度脫生死入法源流海空智藏一切法
相因有為生其源不實其歸亦空所以者何
法相之興由於衆生衆生既空法相亦空法
相之興由於鬼神鬼神既空法相亦空法相
之興由於世界世界既空法相亦空法相之
興由於攝教攝教既空法相亦空法相之興
假乎權名權名既空法相亦空法相之興生
於興造興造既空法相亦空法相之興由於
善方善方既空法相亦空法相之興由於惡
生惡生既空法相亦空法相之興由於不足
不足既空法相亦空法相之興由於知足知
足既空法相亦空法相之興由於眼根眼根
既空法相亦空法相之興由於耳根耳根既
空法相亦空法相之興由於鼻根鼻根既空
法相亦空法相之興由於舌根舌根既空法
相亦空法相之興由於身根身根既空法相
亦空法相之興由於意根意根既空法相亦
空以是因故知法相體皆生於空自空生空

是知空空非有實際若化眾生眾生受化得法宗本以度苦海所行法相即便歸空所以者何若不歸空云何而住住定何方以无方所是謂為空何謂因空而生於空法相不定若生於實不能變通是知法相不從實生不從實生是因空生因空生故是曰為空空體云何能生空法故知空不出空若出於實无有是處云何法相由於眾生若无眾生則无法相以眾生故生无量法是知法相由眾生與云何眾生悉是空法一切眾生其本悉空建體亦空如大芭蕉如炎如幻修生故滅是則為空云何法相隨眾生空起滅同故以是因緣眾生滅盡法亦滅盡眾生未盡法相未盡因藉而生與之起滅不得相離是則皆空云何法相生於鬼神若无鬼神則无敬法以鬼神故敬法自生是知敬法由鬼神生云何鬼神悉是空法一切鬼神非正定住捨身受身終歸真道是則為空云何敬法逐鬼神空起滅同故以是因緣鬼神滅盡敬法亦滅鬼神未盡敬法未盡因藉而生與之起滅不得

相離是則皆空云何法相由於世界若无世界則无異法以世界故異法自生是知異法由世界生云何世界悉是空法一切世界毀滅不定終歸於空是則為空云何異法隨世界空起滅同故以是因緣世界滅盡異法亦滅世界未盡異法未盡因藉而生與之起滅不得相離是則皆空云何法相由於攝教若无攝教則无禮法以攝教故禮法自生是知禮法由攝教生云何攝教悉是空法一切攝教以人而有人非實法是則為空云何禮法隨攝教空起滅同故以是因緣攝教滅盡禮法亦滅攝教未盡禮法未盡因藉而生與之起滅不得相離是則皆空云何法相假手權名若无權名則无方便法以權名故方便法自生是知方便法由權名生云何權名悉是空法一切權名隨應而立是則為空云何方便法隨權名空起滅同故以是因緣權名滅盡方便法滅盡權名未盡方便法未盡因藉而生與之起滅不得相離是則皆空云何法相生於興造若无興造則无工巧法以興造

故工巧法自生是知工巧法由興造生云何興造悉是空法一切有作悉皆磨滅是則為空云何工巧法隨興造空起滅同故以是因緣興造滅盡工巧法滅盡興造未盡工巧法未盡因藉而生與之起滅不得相離是則皆空云何法相生於善方若无善方則无仁慈法以善方故仁慈法自生是知仁慈法由於善方云何善方悉是空法一切善方不令正足故是則為空云何仁慈法隨善方空起滅同故以是因緣善方滅盡仁慈法滅盡善方未盡仁慈法未盡因藉而生與之起滅不得相離是則皆空云何法相由於惡生若无惡生則无傷物法以惡生故傷物法自生是知傷物法由於惡生云何惡生悉是空法一切惡生終歸善源是則為空云何傷物法隨惡生空起滅同故以是因緣惡生滅盡傷物法滅盡惡生未盡傷物法未盡因藉而生與之起滅不得相離是則皆空云何法相生於不足若无不足則无求法以不足故求法自生是知求法由不足生云何不足悉是空法一

切不足有止足故是則為空云何求法隨不足空起滅同故以是因緣不足滅盡求法滅盡不足未盡求法未盡因藉而生與之起滅不得相離是則皆空云何法相與於知足若无知足則无厭法以知足故厭法自生是知厭法由知足生云何知足是空法一切知足不全正故是則為空云何厭法隨知足空起滅同故以是因緣知足滅盡厭法滅盡知足未盡厭法未盡因藉而生與之起滅不得相離是則皆空云何法相由於眼根若无眼根则无色法以眼根故色法自生是知色法由眼根生云何眼根悉是空法以不定觀是則為空云何色法隨眼根空起滅同故以是因緣眼根滅盡色法滅盡眼根未盡色法未盡因藉而生與之起滅不得相離是則皆空云何法相由於耳根若无耳根则无聲法以耳根故聲法自生是知聲法由耳根生云何耳根悉是空法聽受无常念念生滅是則為空云何聲法隨耳根空起滅同故以是因緣耳根滅盡聲法滅盡耳根未盡聲法未盡因

藉而生與之起滅不得相離是則皆空云何法相由於鼻根若无鼻根则无香法以鼻根故香法自生是知香法由鼻根生云何鼻根悉是空法受諸香氣念念生滅是則為空云何香法隨鼻根空起滅同故以是因緣鼻根滅盡香法滅盡鼻根未盡香法未盡因藉而生與之起滅不得相離是則皆空云何法相生於舌根若无舌根则无味法以舌根故味法自生是知味法由舌根生云何舌根悉是空法受諸滋味念念生滅是則為空云何味法隨舌根空起滅同故以是因緣舌根滅盡味法滅盡舌根未盡味法未盡因藉而生與之起滅不得相離是則皆空云何法相生於身根若无身根则无著法以身根故著法自生是知著法由身根生云何身根悉是空法受諸細滑念念生滅是則為空云何著法隨身根空起滅同故以是因緣身根滅盡著法滅盡身根未盡著法未盡因藉而生與之起滅不得相離是則皆空云何法相生於意根若无意根则无煩惱法以意根故煩惱法自

生是知煩惱法由意根生云何意根悉是空法受諸攀緣念念生滅是則為空云何煩惱法隨意根空起滅同故以是因緣意根滅盡煩惱法滅盡意根未盡煩惱法未盡因藉而生與之起滅不得相離是則皆空是十六法相皆假因緣而生此相因緣相滅則法相滅是知諸法有為之相一切皆空所以爾者有為之法有壞有滅有與有起一切眾生悉得无上正真道果有為之體則歸无為以此而言一切有為是大空聚一切无為是湛然法離空有境所以爾者若言其空則能感化若言其有不可尋求是為非无非有境界汝今修法當修无上无為湛然之法勿行有為著相之法爾時海空智藏復白天尊大聖所說實為微妙我心今者猶有所疑願垂解說使得通悟天尊今說有為法者其相不實无為法者其理不空如今所見有為諸法實相炳然形質易了動止云為可以理見天尊今日說以為空无為之法寂絕玄邈无有影響不可尋付

難以情測天尊今者說言為有即是二途譎然乖背使未來世一切眾生云何修行至真道本爾時

天尊答海空智藏言汝勿邪疑執有著相以尋至真无上之道寧可得乎真士當知一切

諸法有為性相悉皆滅壞无有常住所以者何三界之中所行諸法是因藉眾生心力眾生之性念念生滅有為之法亦復皆爾念念生滅即其生時已是滅相其實時便是空相有不常故故謂為空无為之法不可毀滅不可測量若有感應則隨事顯若无感應湛然恒存以是當知繼有為者則有滅相有滅相故是謂為空无所繼者則无毀滅无毀壞故是謂為有汝當思惟善加分別一切妙法本源所在

爾時海空智藏聞是語已心即醒悟得大明轉即起于座長跪稽首白言天尊所說空有實為奇特冥衷理極不可思議我當奉行徧於弊壤唯願天尊今日隨我共還本國以大神力化導未聞皆令度脫獲最善利是時

天尊答海空智藏言今未是時汝且先去我自時當入汝國教誡人民令悉照解无量深義

海空智藏復白天尊今正是時唯願垂憫入於彼國不為疑難如此懇請再拜不已

天尊嘿然乃許其情願命弟子汝等可辦種種行具我於今日與汝共隨海空智藏入極樂國宣行法事度脫眾生作法橋梁作法梯磴作大明燭作大舟航令諸世間並得解悟无上正真道果說是語已仙卿童子前進作禮長跪白言大聖天尊識時方便善量眾生萬行差品若可化者我大隨喜謹當莊嚴辦種種具於是即前以神力化生四億真仙道士身長丈二容儀特絕端正殊妙世界罕雙垂戴玄冠俱披翠帔一道士皆執七寶

蓮華高十二丈其華開敷芬芳晃曜照一國中皆作紅色口誦靈書隱語之文聲震世界圍繞仙卿以為眷屬既入國門无量无边清信士女滿道迎候散華布地无復空缺皆厚數尺燒香之氣蔚鬱成雲結在虛空行者清

涼免於熱惱即於是日入寶聚城城中有王號曰善種與諸眷屬羣臣吏民數千億人善種王后亦率後宮一切眷屬滿十萬人設高廣座珍寶莊飾牀蓆帷帳莫不奇麗王與臣后各住一面寂然聽法爾時

天尊與諸真士登座而坐威神炳發超絕世界光明巍巍不可量極仙卿童子即出眾前高聲唱言道在不遠若深願者懇倒便獲汝等眷屬今可一心諦觀身法如幻如化如電如風无有的主皆應毀滅汝今云何溺此壞法深著六情不念真道命若終畢神魂長逝一歷三塗渺然永絕无復出期沉溺苦海痛毒无數寧可勝言汝等當知離此患難說是語已一切眾會咸皆驚悸戰汗失辭仙卿童子承此方便即變身中作大海水渺渺漫漫不見崖域以今會眾置在一邊依寶聚城如舊不失浩然迥望見有一洲莊嚴極麗寶臺高峻上鄰日月下掩雲霧仙卿童子處在臺上相好堂堂侍衛无極此臺四面深潭无底風浪衝天震蕩日月仙卿童子舉手遙呼善

種大王及衆眷屬此大海水必能洗除一切垢障清淨无漏成就勝法汝等會中若厭塵滓樂求道法當投此水就我受教於是衆會不問男女悉皆解衣競入於水有至膝間便返退者即作是念此大海水云何可置至彼岸處未見其理徒為沒溺无益道真或有至腰便返退者即自思惟我今入水未為過遠去彼聖人殊為渺邈何為自溺空喪身命即此衆中有八十萬人心自念言我此身命衆若之本會自消爛何為愛惜長養惡源假使不能得至彼岸沉溺波潮不足怪也即縱身去得至彼所以不決定意不得入於最上法門又此坐中有大賢士七十七萬二千人自念言我聞經誠從聖人教无往不可彼岸臺上神通大力聖德在焉舉手見招必當見濟我今此心无所畏忌即發歡喜恣力投身歟然之間得至彼岸以決定力即悟正真无為上法是七十七萬二千大德真士既悟道已身即光明洞照遐外即於是時仙童子攝取神力還復如前悟道之人形相既異衆

人驚駭共相謂言向者諸人投水過度沉沒深潭即日云何譎然如此各各嗟訝歎未曾有皆生疑滯向者大海今為在何向沒溺人都不覺異彌更利益如此輩事難可測度設使聞其玄妙之旨心必開悟无復疑網爾時天尊唱言大衆勿疑向者海水彌廣深遠不可測量此事乃是仙童子神通所為非為實有欲知一切樂法輕重度脫少多故現斯瑞汝等當知愛好真道不惜形命此處最大福果无極不可稱量大衆當知我憶往昔龍漢之初有一世界名曰長樂此世界中皆多精進長壽誦經終日不輟時有天尊亦號元始住此世界說靈寶妙法亦以慈悲徧化五方以真文寶符度脫一切是諸衆生並蒙利益於後一時還長樂世界說法教導一切世人以諸因緣未決定故現大神力舉手障天光明自隱變作大聚高二千丈即化自身處于火上以神通故朗徹四方莫不俱現即於火中唱大法音汝等大衆一切眷屬若欲得長壽當入此火就我受法即於爾時有決定

者不怪形命赴火求道爾時元始即於火中授其經典隱形而去皆得長生不死之道汝等大衆當知聖人化物之義其方不一皆是度脫世界人倫所以者何大火洪水其處怖畏不可輕冒若有衆生能不憚苦輕身重法不怪形命當知此人以法因緣終无怪惜赴至道源无有懈退以是因緣向入水人並得道果良由愛法心篤實故大衆當知往昔元始天尊即是今日仙童子彼向得道七萬餘人良由前世樂法赴火以決定心永不退轉今者見海故能投身成就无為第一上行是時天尊說此語已凡是向者不入水人即發大心悟无憂轉歡悅前時心不決定失道宗本追悔何益是時海空智藏即起長跪讚歎天尊所說妙法深奧奇特利益无量一切衆生得法梯磴直至寂境而我今者向有小疑一切大衆亦同斯惑是以頻煩啓請天尊願賜哀愍曲垂解釋天尊向說往昔元始出世道人號曰天尊此稱崇高巍巍无上萬物弘範仙聖所挹

云何今者退居弟子不得高位以度世人以何因緣降位如此爾時

天尊含笑答言海空智藏汝勿如此生於重疑我當謂汝分別解說令汝開悟超昇上道海空智藏夫聖人無為以眾生故故應有為

聖人之心常自寂魄以眾生感故示形相

眾生感應因緣不同聖人應生其體亦異是知聖形不可測度隨眾生感應然後為狀所以者何眾生能感此大聖師聖師即便應以形質

質眾生能感此小聖師聖師即便應以形質聖師之心未嘗有異眾生感果理致不同譬

如鳴鐘懸在虛空若无扣擊聲理恒存以何因緣聲理恒存以應扣故若有扣者大則大

聲中則中聲小則小聲而此鐘中聲體不異各隨其扣發響不同聖人亦爾湛然之理等

一不異隨物應形萬種差別海空智藏當知今日一切眾生感我為大師以先緣故感仙

卿童子為次師亦以先緣故

爾時海空智藏又白天尊向所解說聖人无

為緣眾生心故現有為隨眾生感所現各異斯旨微妙實深理蹟後說又云一切眾生以因緣故感果天尊為其大師一切眾生以因緣故感仙卿童子為其次師我等今者願聞因緣唯願天尊更垂分別具通妙旨令諸大

眾悉皆照了无復疑惑爾時

天尊告海空智藏言汝今諦聽勿得懈怠我當為汝委曲陳說汝不憶耶在昔過去萬八

千劫有一世界號曰方城此世界中有一王都號曰妙極即是今者極樂之國方城世界

土地平正无有丘坑沙礫荆棘四面清潔世界純植甘果諸泉清池悉皆甘美一切眾生

飲水食果无有爭競處處並有七寶之山有欲求者往詣此山應念即至无所乏少是中

眾生快樂自在无諸疾病定壽七百臨死之日自詣塚間分袂而去妙樂國土有一大王

名曰制法聰明特達才藝咸備形容妍正如圓滿月福德莊嚴无處不善王有千子悉皆

朗敞眾伎頌該莫不了達制法大王嘗以日中談說妙道諸子侍衛未嘗違離一切人民

悉皆陪奉无有懈倦是諸子中有一王子名曰勝因居在第九神秀獨拔英聲蓋世是諸王子推為最上大玉講說諸妙經典其中眾會若有所滯有一大臣名曰進善常為一切有疑網故諮於勝因求為通釋勝因轉為分

別解說決諸未悟悉得通了大王若有不講之日進善亦能啓白大王勅令勝因代王談

說如此經歷六百餘年一切國人常發是言我直奉接制法大王謨訓規範通宣道教暢

說至真无為上果雖復快樂日聞未聞日見未見必當成就一切妙源而我等心有時昏

塞生諸疑滯或有未領或未能釋便成憤開自為煩惱賴得勝因剖析重疑申別真理使

我等心醒然了覺未嘗一事永為闕闕如此二聖開導我等實為隆慈唯願未來長為我

等作大道主大王為尊勝因為次一切四生必當免於三塗五苦九幽之難以是因緣勝

因王子功德報果重於制法所以者何制法大王雖唱妙義而諸眾生有不了者非直不

得成就慧業乃亦加於无量煩惱勝因王子

善能除釋衆生煩惱成就智因以是之故報
果爲重海空智藏制法大王豈異人乎即我
身是勝因王子即今仙卿童子身是進善大
臣今汝身是仙卿童子藉以前世善釋煩惱
利衆生故故先於我成等正真於龍漢初說
法教化我方以今開皇之始登上果仙卿
童子以昔佐我通微妙義一切衆生有誓願
故是故今日從衆生願復出斯土汝寧生疑
遂爲忘失說是語已海空智藏即憶前事洗
然不失成就妙道當於一生獲具足轉同等
上利益衆生无有限量
爾時海空智藏復更作禮長跪問言天尊今
說實竒微妙未審云何以名斯經奉持讀誦
得幾許福因
天尊答言此經是汝啓導所成應當名爲海
空智藏此經即是衆寶之聚又當名爲七寶
莊嚴若有世人受持此經一句一偈供養尊
重或以錦囊或以繡襪或以寶函如是種物
貯一句一字能供養者此人則爲水陸空行
一切有識之所愛敬无量神祇之所尊重常

加衛護爲作福田若有世人能讀此經一句
之言當知此人已入道源於未來世必當得
果善能識讀无量典誥具解衆生所書之字
諸天隱文皆悉通達无有障礙若復有人能
誦此經一句之言當知是人已涉道本於未
來生必當得果善能諸憶无量妙義諸天金
書一切真文皆悉明了永不遺忘若復有人
書寫此經爲知此人是真人侶於未來世必
當得果神通妙力能宣大法救度衆生若復
有人解說此經當知是人已入九轉於未來
世必當得果洞達玄微曉了妙義爲一切人
通釋疑滯利益无量成就大法若復有人恭
敬此經當知此人已入玄境於未來世必當
得果三十二相威儀妙體若復有人禮拜此
經當知此人已明法性於未來世必當得果
金剛之身堅強不壞若復有人讚歎此經當
知此人已經廣說无上妙義於未來世必當
得果微妙之聲響徹无量大千國土衆生聞
者悉得道要况併能受持讀誦書寫解說恭
敬禮拜讚歎宣揚是人得福不可限量巍巍

尊重得證第一海空智藏我憶過去三千劫
中常以至心修行此法未嘗懈怠以是因緣
得今妙果无上之智汝今應當專意奉持成
就无爲最上法體
是時海空智藏白天尊言未審受持如是妙
典應有何法唯願通釋使未來世咸得聞知
獲大善利爾時
天尊答言大賢汝乃能爾爲未來世一切衆
生扣大法鍾求无上響實爲慈悲利益无量
我今當爲說其義趣海空智藏此經淵妙乃
是玄都玉京一切大聖之所寶秘珍貴尊重
難可得見我以汝心勤懇專到是故今日口
傳於汝汝當殷重領受勿失若宣世人務當
選擇皆令應法然後可授何等世人是爲應
法應法之體其理有六何者爲六若有學人
從少以來入道法藏已經受持靈寶真文善
達洞玄微妙之旨通釋其義无有滯惑如是
等人乃可授之若有學人心不執著有爲法
相善能分別第一義空洞觀法性皆歸空寂
等視彼我无内外想既心自了又能教人如

是等人乃可授之若有學人勤行精進晝夜不息不自為已專度眾生不惜我身利益萬物如是之人乃可授之若有學人善持戒行威儀具足為一切人之所師範教化弟子不以執著繼累之心恒以大小無為之心授於諸法如是之人乃可授之若有學人行大忍辱惡罵鄙事皆悉能受善事歸人穢惡還以執心洞達不計彼我如此之人乃可授之若有學人善解思微繼惟念力未嘗放散專精篤思務行道法通達妙相不執彼我如此之人乃可授之海空智藏當知如是六種學人乃可授與今日所說所以爾者是六種人能行斯法光揚妙教利濟眾生是故汝應授其此訣若復有人執著有為沉溺六觸不解建立無上法因或於所見以自欺負如是之人聞斯妙教必當驚愕數言非實生諸異論結於疑網既不能行又生誹謗以是緣故汝勿宣說海空智藏此經功德超拔羣典三清妙說三洞至言皆所不及若有世人不敬斯言輕忽侮慢或生誹謗稱此經文非至聖說當

知此人已是三塗眷屬地獄因緣見世必嬰无量怖畏煩惱苦毒未來生中燒煮剝多備罹痛楚不可勝記如明真科孱然不失是時天尊歎善其事即說頌言

海空智藏 大哉真士 出於此界

德行圓充 說法度人 無有量極

一切恭敬 天人讚善 能扣法鍾

能敷法鼓 能引法流 能宣法教

是法宗本 是法橋梁 是法階梯

是法律液 為眾生父 為眾生依

為眾生命 為眾生體 德行備具

威容顯發 言詞吐納 自然和雅

來至我所 便求上法 不辭嶮遠

不憚劬勞 唯法是須 餘無外想

我心歡喜 即吐妙音 空有兩相

曉了分別 無復疑滯 洗然清釋

一切眾生 皆獲真果 地獄清涼

天人曠廣 此法玄曠 眾生所宗

玉京上仙 皆所敬習 我今令為

海空智藏 說此深法 既度真人

太上一乘海空智藏經卷之三

又益大眾 汝等當知 海空智藏
 是汝等師 能為汝等 作大福業
 汝等應當 恭敬朝禮 懇倒殷重
 求受妙法 彼此智辯 莫不周赴
 我今悉授 此無上法 憑委付囑
 海空智藏 汝等大眾 及未來世
 一切學人 若有所疑 可從諮決
 自然悟解 無復疑滯 稽首作禮